

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LIM GUAN ENG
[BAGAN]**

TARIKH : 2 DISEMBER 2020 (RABU)

SOALAN NO. 22

Minta **PERDANA MENTERI** menyatakan prestasi PETRONAS yang merosot, impak kepada negara dan sama ada benar tawaran jawatan Pengerusi Petronas kepada YB Gua Musang berdasarkan satu transaksi politik yang akan menjejaskan keyakinan pasaran kepada Petronas.

JAWAPAN

**YB DATO' SRI MUSTAPA BIN MOHAMED,
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Sebagaimana Ahli Yang Berhormat sedia maklum, Kumpulan PETRONAS mencatatkan kerugian selepas cukai (LAT) sebanyak RM21 bilion pada suku kedua berakhir 30 Jun 2020 berbanding keuntungan selepas cukai (PAT) RM14.7 bilion dalam tempoh sama 2019.
2. Kerugian ini disebabkan oleh pendapatan yang rendah dan rosot nilai terhadap aset yang ketara berikutan penurunan harga minyak ekoran permintaan lemah akibat penularan wabak COVID-19 dan keadaan lebih bekalan dalam pasaran. Pada suku kedua 2020, harga minyak mentah Brent terus jatuh ke paras purata sekitar AS\$29.20 setong berbanding AS\$68.83 setong pada suku kedua tahun 2019.
3. Pada separuh pertama tahun ini, industri minyak dan gas global berdepan cabaran besar akibat permintaan lemah dan lambakan bekalan yang disifatkan sebagai "*Great Reset*". Keadaan ini telah memberi implikasi yang negatif kepada harga minyak dunia serta kedudukan kewangan kebanyakan syarikat minyak dan gas utama dunia termasuk PETRONAS.
4. Keadaan pasaran yang mencabar dan tidak menentu ini dijangka akan berterusan sehingga separuh kedua 2020. Unjuran yang dibuat oleh Rystad Energy pada bulan April 2020 menjangkakan syarikat minyak dan gas global akan kehilangan pendapatan sebanyak AS\$1 trilion pada tahun ini berikutan keadaan pasaran semasa.
5. Dalam hal ini, sebagai syarikat minyak dan gas negara, PETRONAS terus komited dengan usaha untuk mempertahankan aliran pendapatan dan mengoptimumkan kos bagi mengimbangi kesan

negatif situasi harga minyak rendah terhadap keuntungannya pada masa yang sama menjaga kepentingan strategik negara.

6. Untuk strategi tempoh jangka masa panjang, PETRONAS akan terus fokus dalam melaksanakan strategi pertumbuhan serampang tiga mata atau *three-pronged strategy* iaitu:
 - (i) memaksimumkan penjanaan tunai;
 - (ii) memperluas perniagaan teras dan menggiatkan usaha mengekalkan organisasi dalam mengharungi perubahan; dan
 - (iii) memastikan kemampanan jangka panjang syarikat melalui penglibatan di dalam peluang perniagaan baharu.
7. PETRONAS juga akan terus meninjau peluang dan portfolio perniagaan baharu bagi memantapkan lagi daya tahannya dalam berdepan persekitaran pasaran global yang amat mencabar terutamanya di dalam tenaga boleh baharu seperti solar dan tenaga angin.

Tuan Yang di-Pertua,

8. Tawaran jawatan kepada mana-mana individu tidak akan menjejaskan keyakinan pasaran terhadap Petronas. Ini adalah kerana Petronas adalah sebuah syarikat yang diuruskan dengan baik dan diterajui oleh pasukan pengurusan yang cekap. Keyakinan pasaran serta para pelabur bergantung kepada pelbagai faktor seperti pertumbuhan ekonomi negara dan perdagangan dunia yang sangat terkesan dengan krisis pandemik COVID-19 yang sedang melanda dunia. Faktor ini ditambah dengan kejatuhan teruk harga minyak mentah dan perang perdagangan (*trade war*) antara China dan Amerika Syarikat.

Sekian, terima kasih.